

LIPA njech dale rosće

Zwoprawdźenje zajimawych idejow je druhdy z mytowanjom zwjazane. Serbske šulske towarstwo (SŠT) je lětsa myće přijało, kotrež chce mjez druhim na dobro rozšěrjenja serbskich rěčnych rumow zasadzić.

Budyšin (SN/MiR). Serbske kubłanske srjedzišćo LIPA ma so dale profilować. Za to chce Serbske šulske towarstwo, nošer zarjadnišća, tež pjenjezy wužić, kotrež je we wšelakich mytowanjach přijało. Dvě myće zdoby lětsa we wubědźowanju Załožby za serbski lud „Rěč zwjazuje“.

Zhromadnje ze Serbskim Sokolom chce SŠT serbski koparski camp za džěci a młodostnych přewjesć. „Projekt móžemy z pomocu zdobyteho myta we wysokosci tysac eurow financować“, praji předsydka SŠT Katharina Jurkowa. SŠT chce na campje džěłarnički poskićić, w kotrychž so serbska rěčna komunikacija kwalifikuje. To rěka: Wobdźělnikam sposrědkuja so zapřijeć a ze swěta sporta, wosebje z wobłuka kopańcy. Serbske rěčne rumy so na tute wašnje rozšěrjeja.

Zdobom dze tež wo to, serbsku identitu mjez džěcimi a młodostnymi skrućeć kaž tež wšelakore rěčne rumy mjez sobu zwjazac. Za doskónčnu realizaciju projekta wšak trjebaja dalšich pjenjezydawarjow.

Tamny a runje tak naročny projekt z lětušeho založboweho wubědźowanja je nowy koncept za Serbski sociokulturelny centrum LIPA w Smjerdźacej. Za tónle namjet je SŠT před njecyłymaj tydzenjomaj 3 500 eurow přijało. Zo by so zarjadnišćo w Smjerdźacej dale kwalifikowało, pyta SŠT nětko zwjazkarjow. „Trjebamy partnerow, kotřiž widža LIPU jako woprawdźite serbske kubłanske srjedzišćo w Hornjej Łužicy“, rjekny jednaćel SŠT Andreas Ošika, „přejemy sej podpěraćelow, kotřiž koncept ze swójskimi idejemi wobohaćja.“ Při tym myslu towarstwo mjez druhim na to, zarjadować LIPU jako „hybridnu“ městnosć z mnohimi digitalnymi poskitkami, kotrež maja šěršemu publikumej přistupne być. Za swoju ideju chce SŠT gmejnsku radu Ralbicy-Róžant zdobyć. Rady chce Andreas Ošika, kiž je ze swojim

teamom založbje za myće přewšo džakowny, z tamnišim wjesnjanostu Hubertusom Ryčerjom (njestronjan) rěčeć a jeho kaž tež člonow gmejnskeje rady do sobudžěla na koncepcje zapřijeć.

Kaž Hubertus Ryčer na naprašowanje SN zdžěli, čaka na wotpowědny list ze stron SŠT. „Potom chcu gmejnsku radu wo ideji informować a z radzićelemi wo tym wuradźować“, wón rjekny. Tuchwilu je w imobiliji, kotraž, runje tak kaž ležownosć, gmejnje słuša, hišće žlobik Ralbičanskeho džěčaceho dnjoweho přebywanišća zaměstnjeny. Tón počehnje kónc přichodneho abo spočatk zapřichodneho lěta wróćo do Ralbic – ručež je tam nowa pěstowarnja dotwarjena. „Na kóncu pak zaleži na rozsudach gmejnskeje rady, što ma so w rumnosćach w přichodze stać“, wjesnjanosta doda. Zo so angažement SŠT za LIPU wudani dopokazaja wuknihowane kursy kaž tež nowosće, na přikład Kulturna zahroda. Za to je SŠT mytowanske pjenjezy wužilo, kotrež je loni we sakskej wubědźowanju simul plus dobyło.